

春秋公羊經何氏釋例

春秋公羊經何氏釋例卷三

武進劉禮部逢祿申受著

名例第五

隱元年春王正月傳王者孰謂謂文王也注文王周始受命之王方陳受命制正月放假以爲王法不言諡者法其生不法其死與後王共之

秋七月天王使宰咺來歸惠公仲子之賵注云天王者時吳楚上僭稱王王者不能正而上自繫於天也春秋不正者因以廣是非

成八年天子使召伯來錫公命傳其稱天子元年春王正月正也其餘皆通矣注謂不繫於元年者或言王或言天王或言天

子皆相通矣以見刺譏是非也天子者爵稱也聖人受命皆天
所生故謂之天子

隱五年初獻六羽傳譏始僭諸公也天子三公稱公王者之後
稱公其餘大國稱侯小國稱伯子男三公天子之相也自陝而
東者周公主之自陝而西者召公主之一相處乎內注禮司馬
主兵司徒主教司空主土

桓八年祭公來傳天子之三公也注天子置三公九卿二十七
大夫八十一元士凡百二十官下應十二子祭者采也天子三
公氏采稱爵

僖八年公會宰周公傳天子之爲政者也注與天子參聽萬機
隱元年祭伯來傳天子之大夫也注祭者采邑也伯者字也天

子上大夫字尊尊之義也

桓四年天王使宰渠伯糾來聘傳下大夫也注下大夫繫官氏名且字繫官者卑不得專官事也稱伯上敬老也禮君於臣而不名者有五諸父兄不名上大夫不名盛德之士不名老臣不名

定十四年天王使石尙來歸賑傳天子之士也注天子上士以名氏通

隱元年天王使宰咺傳宰官也咺名也以官氏宰士也注上士以名氏通中士以官錄下士畧稱人

襄十五年劉夏逆王后于齊傳天子之大夫也其稱劉以邑氏也注諸侯入爲天子大夫不得氏國稱本爵故以所受采邑氏

稱子采者不得有其土地人民采取其租稅而已禮曰三公之田視公侯卿視伯大夫視子男元士視附庸稱子者參見義顯爲天子大夫亦可以見諸侯不生名亦可以見爵亦可以見大夫稱不稱劉子而名者禮逆王后當使三公故貶明非禮也定四年劉卷卒葬劉文公注諸侯入爲天子大夫更受采地於京師天子使大夫爲治其國有功而卒者當益封其子時劉卷以功益封故不以故國而以采地書葬

隱三年辛卯尹氏卒

見譏例

僖五年公及齊侯宋公陳侯衛侯鄭伯許男曹伯會王世子于首戴傳殊會王世子世子貴也猶世世子也注自王者言之以屈遠世子在三公下禮喪服斬衰曰公上大夫之衆臣是也自

諸侯言之世子尊於三公此禮之威儀各有所施

宣十年天王使王季子來聘傳天子之大夫也其稱王季子貴也母弟也注天子不言子弟故變文上季繫先王以明之著其骨肉貴體親也

十五年王札子殺召伯毛伯傅長庶之號也注禮天子庶兄冠而不名所以尊之天子不言子弟故變文上繫先王以明之不稱伯仲者辟同母兄弟

文元年天王使叔服來會葬注叔服者王子虎也服者字也叔者長幼稱也不繫王者不以親疏錄也不稱王子者時天子諸侯不務求賢而專貴親親故尤其在位子弟刺其早任以權也諸侯得言子弟者一國失賢輕

隱元年公及邾婁儀父盟于昧注公者五等之爵最尊王者探
臣子心欲尊其君使得稱公故春秋以臣子書葬者皆稱公

七年葬蔡桓侯

注魯臣子

桓十一年鄭忽出奔衛傳忽何以名春秋伯子男一也辭無所
貶注質家爵三等法三光文家爵五等法五行合三從子制由
中也

莊十年刑敗蔡師于莘傳荆州名也州不若國國不若氏氏不
若人人不若名名不若字字不若子注因周本有奪爵稱國氏
人名字之科故加州文備七等以進退之

定五年於越入吳傳於越者未能以其名通也越者能以其名
通也注越人自名於越君子名之曰越治國有狀能與中國通

者以中國之辭言之曰越治國無狀不能與中國通者以其俗
僻言之因其俗可以見善惡故云爾赤狄以赤進者狄於北方
總名赤者其別與越異也

襄十有一年作三軍傳三卿也古者上卿下卿上士下士注說
古制司馬官數古者諸侯有司徒司空上卿各一下卿各二司
馬事省上下卿各一上士相上卿下士相下卿足以爲治襄公
益司馬作中卿官踰王制言軍者本以軍數置之

莊元年單伯逆王姬傳吾大夫之命乎天子者也注以稱字也
禮諸侯三年一貢士於天子天子命與諸侯輔助爲政所以通
賢共治示不獨專重民之至大國舉三人次國舉二人小國舉

一人

隱九年俠卒傳吾大夫之未命者也注以無氏

隱元年及宋人盟于宿傳內之微者也注謂士也春秋上刺王公下譏卿大夫而逮士庶人

莊二十五年陳侯使女叔來聘注稱字敬老也禮七十雖庶人主孝而禮之孝經曰昔者明王之以孝治天下也不敢遺小國之臣是也

二十七年公子友如陳葬原仲注稱字者葬從主人

文九年楚子使椒來聘傳始有大夫也

見三世例

襄二十三年邾婁鼻我來奔傳以近書也

見三世例

釋曰昔子路問爲政子曰在正名名不正則政事不成禮樂不興刑罰不中然則辨名正分莫著于春秋春秋上刺王公

下譏卿大夫而逮士庶人則爵等之數尤所汲汲矣傳曰德合元者稱皇孔子曰皇象元逍遙術無文字德明諡德合天者稱帝河洛受瑞可放仁義合者稱王符瑞應天下歸往夫

皇象元則帝象春

易曰帝出乎震

故君子曰武王其似正月矣

說苑文王

似元年武王似春王周公似正月不及春秋說董子爲正武王句見董子

董子云遠者號尊而地

小近者號卑而地大親疏之義也故德侔天地者稱皇帝天祐而子之號稱天子故聖王生則稱天子崩遷則存爲三王絀滅則爲五帝下至附庸絀爲九皇下極其爲民故雖絕地廟位祝牲猶列于郊號宗于代通俗宗故曰聲名魂魄施于虛極壽無疆此言唯王位在德元而儀刑萬邦也王官之等三公一位上大夫卿一位下大夫一位上士一位中士一位下

士一位凡六等其受采公視大國上大夫視次國下大夫視小國上中下士視附庸字者方三十里名者方二十里人氏

者方十五里

亦參用董子說國州者狄之

其命數三公八命卿六命大夫

四命皆陰爵居于諸侯也士則二命再命一命不嫌也及其出使雖下士必列諸侯之上尊天子也月遠日則息而象疑于日遯日則消大臣諸侯之象也故三公執璧同于子男卿以下則禽擊寢內之爵同于蕃服雖大日子其義不世伸于諸侯之大夫者世祿而已侯國之制公一位侯一位伯子男同一位凡三等其受地公侯皆方百里伯子男方七十里如五十里其臣命卿一位大夫一位士一位其命數則公九命侯七命伯子男五命公侯之卿三命大夫再命士一命伯子

男之卿再命大夫一命士不命人所見世小國有大夫是也
周公立政之制曰任人準夫牧作三事謂公卿也由其參聽
萬機曰任人亦曰常任由其糾逖王隱曰準夫亦曰準人由
其分陝左右曰牧亦曰常伯三公八命作牧九命作伯是也
虎賁綴衣趣馬近臣給事者也設之小尹左右攜僕百司宮
正以下官也庶府常任之屬治京師者大都常伯之屬治畿
甸者設之小伯藝人表臣百司準人之屬糾察官府都鄙者
也太史上司天事下掌邦國官府都鄙之貳執簡記奉諱惡
天子齋戒受諫者也設之尹伯王官之制如此司徒司馬司
空天子之命卿也亞以置其伍經所謂未命之大夫也旅以
陳其殷經所謂微者是也是謂邦國之制夷微盧居九服之

四設之烝烝君也三亳阪居四方之塞設之尹尹正也城虎
牢以制楚是也春秋之制略同文王官人而譏尹氏以絕禍
貶王子虎以任賢則克知灼見之要也書王季子王札子辨
親疏長幼之節皆不名敬長也親親也祭伯凡伯不名貴貴
也伯糾女叔不名貴老也孔父叔睨不名貴德也不純臣諸
侯治統所寄也二王之後以客禮師法所存也夫是以天子
嚮明諸侯自爲正禮樂行于上刑罰措于下則正名之道得
也

夏五月辛亥郊傳三卜之運也

哀三年桓宮僖宮災傳毀廟也言火復立也不言復立春秋見
者不復見也

十二年用田賦傳譏始用田賦也注若今漢家歛民錢以田爲率矣哀公外慕強吳空盡國儲故過什一

隱元年天王使宰咺來歸惠公仲子之賵傳兼之非禮也

三年尹氏卒傳其稱尹氏何貶譏世卿世卿非禮也

案凡言非禮皆譏也

武氏子來求賻傳其稱武氏子何譏父卒子未命也來求賻何以書譏喪事無求求賻非禮也蓋通于下

桓五年天王使仍叔之子來聘傳譏父老子代從政也

八年祭公來遂逆王后于紀注婚禮成于五然後親迎時王者遣祭公來使魯爲媒可則因用魯往迎之不復成禮疾王者不重妃匹逆天下之母若逆婢妾將謂海內何哉故譏之

十五年天王使冢父來求車傳譏王者無求求車非禮也

莊元年王使榮叔來錫桓公命傳追命也注禮生有善行死當加善諡不當復加錫

三年葬桓王傳改葬也注榮者改葬故惡錄之

僖二十八年衛侯鄭自楚復歸于衛注言復歸者天子有命歸

之名者刺天子歸有罪也

案與曹伯
實同義

文元年天子使叔服來會葬注不稱王子者時天子諸侯不務求賢而專貴親親故尤其在位子弟譏其早任以權也

天王使毛伯來錫公命注古者三載考績文公新即位功未足施而錫之非禮也

五年王使榮叔歸含且贈傳兼之非禮也注去天者含者臣子

職以至尊行至卑事失尊之義也

案去天之義穀
梁文無天得之

王使召伯來會葬注去天者不及事刺比失喪禮也

九年毛伯來求金傳譏王者無求求金非禮也

成八年天子使召伯來錫公命注此錫命稱天子者爲王者長受幼少之義當與賢師良傅如父教子不當賜也

襄十五年劉夏逆王后于齊注不稱劉子而名者禮逆王后當

使三公

案此注非桓八年注是也祭公以遂事見義故不復貶

三十年天王殺其弟年夫注王者得專殺書者惡失親親也未三年不去王者方惡不思慕而殺弟不與子行也不從直稱君舉重者莒殺意恢以失子行錄設但殺弟不書也

王子瑕奔晉注稱王子者惡天子重失親親

昭二十二年王室亂傳言不及外也注刺周室之微故變京師

言王室不言成周言王室者正王以責諸侯也

二十三年天王居于狄泉傳未三年稱天王著有天子也注明天下當救其難而事之

隱二年紀履緌來逆女傳譏始不親迎也

桓三年齊侯送姜氏于謹傳譏諸侯越竟送女非禮也

九年曹伯使其世子射姑來朝傳譏父老子代從政

莊二十七年莒慶來逆叔姬傳譏大夫越竟逆女非禮也

僖元年邢遷于陳儀注譏之也王者封諸侯必居土中所以教化者平貢賦者在德不在險其後爲衛所滅是也

十五年公會齊侯宋公陳侯衛侯鄭伯許男曹伯盟于牡邱遂次于匡公孫敖帥師及諸侯之大夫救徐注言次者刺諸侯緩

于人恩

二十五年宋殺其大夫傅何以不名宋三世無大夫三世內娶

也

案文七年八年十五年傳同

二十八年陳侯如會傳後會也注刺諸侯不慕霸者反歧意于楚失信後會陳岐意于楚在二十七年

文三年晉陽處父帥師伐楚救江傳爲諉也

九年秦人來歸僖公成風之襚傳兼之非禮也

宣元年晉放其大夫胥甲父于衛傳近正也古者大夫已去三年待放君放之非也大夫待放正也

五年齊高固及子叔姬來注禮大夫妻歲一歸宗雙行匹至似

于鳥獸

十年齊崔氏出奔衛傳貶譏世卿世卿非禮也注復見譏者嫌諸侯大夫任輕可世因齊太國禍著故就可以爲法戒

襄五年成陳傳不言諸侯離至不可得而序注刺中國之無信七年陳侯逃歸注刺中國之無義加逃者抑陳侯也

十年成鄭虎牢傳離至不可得而序注刺諸侯既取以爲蕃蔽不能同心安附之

十六年戊寅大夫盟傳徧刺天下之大夫也君若賡旒然注不言諸侯之大夫者明所刺非但會上大夫

昭十九年許世子止弑其君買葬許悼公傳賊未討書葬不次于弑也止進藥而藥殺譏子道之不盡也

二十年盜殺衛侯之兄軌傳母兄稱兄何以不立有惡疾也注

書者惡營衛不固失親親也

定五年歸粟于蔡傳不言諸侯離至不可得而序注與戊陳同義

十四年邾婁子來會公注非邾婁子會人于都也言公者不受于廟

十五年邾婁子來奔喪傳非禮也注禮天子崩諸侯奔喪會葬諸侯薨有服者奔喪無服者會葬

哀十三年晉魏多帥師侵衛傳此晉魏曼多也譏二名非禮也
右譏內小惡九天王二十諸侯二十三凡乙百三十
三條

釋曰司馬遷述董生之言曰春秋者禮義之大宗也主于辨

是非故長於治人撥亂世反之正非唯禁暴討賊而已亂之所生唯禮可以已之禮之失也王侯降爲徒隸荆吳交主中國所謂小雅盡廢其禍如此夫大雅多刺厲王而小雅盡刺幽王何哉曰序不云乎厲王無道天下蕩蕩無綱紀文章而瞻卬召旻二篇獨言刺幽王大壞以是知文武之大經大法皆厲變更之而大滅之者幽也其細節數目幽復悉去之而階之禍者宜也是謂三代之亡詩亡然後春秋作以繼三代而治萬世者也夫先立乎其大者而小者可以盡復先正乎內之治而諸夏可以盡同董子云悖亂之微細惡不絕之所致故春秋紀纖芥之失反之王道傳曰內小惡書外小惡不書言自近者始也是以譏觀魚食也取郕鼎衛寶莒焉狩于

郎遠也築三臺甚焉毀泉臺亦非也君道失也觀社納幣淫也國君淫宜絕故僅以非禮書也觀用幣女用男摯也會祀伯姬于洮來朝其子大夫妻未及歲歸宗失教戒也夫人姜氏言入失教戒亦志淫也逆婦姜賤也以妾爲妻僭也婚禮之失也文二年公子遂如齊納幣宣元年公子遂如齊逆女喪娶也宣之過甚於文而書之尤著猶桓之不諱成宋亂也忌省殺哀也吉禘速吉也作僖公主欲久喪而不能猶吉禘也喪禮之失也躋僖公亂昭穆也仲嬰齊不稱仲孫亦亂昭穆也獻六羽僭禮于宗廟也丹楹刻桷奢也世室屋壞怠也立武場桓僖廟慎也春夏烝亟也御廩災而猶嘗慢也無正朔而朝廟不奉天也郊禘之僭不可言也不郊猶三望猶朝

廟也四月五月九月郊不時也鼯鼠食郊牛或食其角傷其口視不謹也用牲于門非應變也祭禮之失也蒐闋以宰書弛武備也以亟書不恤民也取郤取防貪而慢疆界也受叛臣邑猶是也來歸侵地取運圍成不矢文德也次郎次合伐齊納糾無勇也楚蔡次厥貉齊衛次五氏畏人也齊侯來獻捷畏也楚使來獻捷畏而受惡人物也會伐宋緩也初稅畝用田賦作邱甲作三軍變制不恤民也聘問帥師不舉重空國也軍禮之失也朝王所非所朝也來歸賑不助祭也不會葬天子慢上也不會葬同姓不親親也襄久于楚畏楚也昭沒于乾侯不容于晉又不事齊也賓禮之失也公子遂以疾復卒而猶繹君臣交失也公子友葬原仲失賢也鄭詹逃來

納佞也馭臣之失也告糴不制國用也築微見諱新延廡不

急荒政也城邑怠而勞民也築三囿三臺楚官勞民以事游

畋也馭民之失也新作南門變常也新作雉門及兩觀久不

脩又踰制也築王姬之館于外通讐又慢王事也狩部通讐

也臣子之道廢也傳曰不可勝讖者壹讖而已此通例也注

曰所傳聞之世外小惡不書書者來接內也春秋以魯爲天

下化首被王化者在可備責之域故從內小惡舉也然則詳

于王而畧于侯國正王以率侯也詳大國而略小國正大以

率小也詳諸夏而不及夷狄正內以率外也故讖求賄求車

求金而王心正讖祭公劉夏逆后而體本正紀履綸同義譏王世

子宰周公會諸侯而儲貳宰輔之體正讖尹氏武氏子仍叔

之子而世卿之禍正

齊崔氏同義

譏叔服而用賢之義正譏宰渠

伯糾祭叔榮叔聘錫小人而九伐之法正譏毛伯錫文公命

而考績之典正譏召伯錫成公命而敘冑之經正譏加禮妾

母而尊卑之分止譏一使兼賄

秦人歸祕同例

一使含賄而下交之

禮正

此始從傳注辨見箋

譏歸衛侯鄭曹伯襄而建侯之權正譏殺年

夫奔王子瑕而親親之倫正

盜殺衛侯兄輒同義

所謂正王以率侯也

書王室亂王居狄泉而衆著于勤王矣譏次匡救徐戍陳鄭

歸粟于蔡而衆著于恤鄰矣譏伐楚救江而衆著于惡詐矣

譏鄭伯不盟乞盟陳侯如會逃歸而衆著于親中國矣譏大

夫盟而衆著于慎名器矣譏晉放大夫而衆著于禮去臣矣

譏宋內娶而衆著于敬宗廟矣譏齊送女而衆著于謹侯度

矣所謂正大以率小也譏邢遷而衆著于固國不在險矣譏蕭叔邾婁子而衆著于朝會之禮矣譏邾婁子奔喪而衆著于親疏之節矣譏曹許世子而衆著于事父之道矣譏莒慶高固而衆著于事君之義矣凡皆所謂正內以率外也是以子思子述春秋之化曰聲名洋溢乎中國施及蠻貊凡有血氣莫不尊親故曰配天言乎大者如三辰之建四時小者如列宿之錯峙而各有職也

褒例弟六

隱元年公及邾婁伐父盟于昧傳稱字後之也

七年滕侯卒

八年辛亥宿男卒

十一年滕侯薛侯來朝

桓二年秋七月紀侯來朝注稱侯者天子將娶于紀與之奉宗廟傳之無窮重莫大焉故封之百里明當尊而不臣所以廣孝敬蓋以爲天子得娶庶人女以其得專封也

莊十三年齊侯宋人陳人邾婁人會于北杏注齊桓行霸約束諸侯尊天子故爲此會也時未爲諸侯所信向故使微者會桓公不辭微者欲以卑下諸侯遂成霸功

冬公會齊侯盟于柯傳桓之盟不日其會不致信之也桓公之信著乎天下自柯之盟始焉注諸侯由是翕然信鄉復從再會于鄆同盟于幽遂成霸功

十六年邾婁子克卒

見進
黜表

二十八年丁未邾婁子瑣卒

同上

閔二年齊高子來盟傳不稱使我無君也不名喜之也桓公使高子將南陽之甲立僖公而城魯

僖元年齊師宋師曹師次于聶北救邢傳救言次不及事也蓋狄滅之不言狄滅爲桓公諱也上無天子下無方伯天下諸侯有相滅亡者桓公不能救則桓公恥之

夏六月邢遷于陳儀齊師宋師曹師城邢

二年正月城楚邱傳城衛也蓋狄滅之注不書遷與救次者使若始時尙倉卒有所救其後晏然無干戈之患所以重其任而厚責之

齊侯宋公江人黃人盟于貫澤傳大國言齊宋遠國言江黃則

以其餘爲莫敢不至也注不進江黃者爲徧至之詞

三年齊侯宋公江人黃人會于陽穀傳此大會也曷爲未言耳

注費澤桓公曰無障谷無貯粟無易樹子無以妾爲妻注時桓言盟

公功德隆盛諸侯咸曰無敢不從曷爲用盟哉故告誓而已

案十

三年注自此會後不復舉小國者從一法之後小國言從令行大國惟曹許以上乃會

四年春正月公會齊侯宋公陳侯衛侯鄭伯許男曹伯侵蔡蔡

潰遂伐楚次于陘傳侯屈完也注楚强大卒暴征之則多傷士

衆桓公先犯其與國臨蔡蔡潰兵精威行乃推以伐楚楚懼然

後使屈完來受盟修臣子之職不頓兵血刃以文德優柔服之

故詳錄其止次待之善其重愛民命生事有漸故敏則有功

夏許男新臣卒注不言于師者桓公師無危不月者爲下盟去

月方見大信

楚屈完來盟于師盟于召陵傳不稱使尊屈完以當桓公也再言盟喜服楚也桓公救中國而攘夷狄卒帖荆以此爲王者之事也其言來與桓爲主序績也

十四年諸侯城緣陵傳城杞也蓋徐苞脅之注桓公德衰待諸侯然後乃能存之

十七年滅項傳君子之惡惡也疾始善善也樂終桓公嘗有繼絕存亡之功故君子爲之諱也注不言服楚獨舉繼絕存亡者明足以除殺子糾滅譚遂項覆終身之惡服楚功在覆篡惡之表所以封桓公名當如其事也

十八年宋公曹伯衛人邾婁人伐齊五月戊寅宋師及齊師戰

于廩齊師敗績

見伐例

十九年宋人執滕子嬰齊夏六月宋人曹人邾婁人盟于曹南
鄆子會盟于邾婁己酉邾婁人執鄆子用之

見諱例

二十二年十有一月己巳朔宋公及楚人戰于泓宋師敗績傳
偏戰者日爾此其言朔春秋辭繁而不殺者正也君子大其不
鼓不成列臨大事而不忘大禮有君而無臣以爲雖文王之戰
亦不過此也注言朔亦所以起其有君而無臣襄公所行帝王
之兵也有帝王之君宜有帝王之臣有帝王之臣宜有帝王之
民未能醇粹而守其禮所以敗也陸戰當舉地舉水者大其不
以水厄人也

二十三年庚寅宋公慈父卒

見諱例

二十八年四月己巳晉侯齊師宋師秦師及楚人戰于城濮楚師敗績注齊桓先朝天子晉文先討夷狄者晉文之時楚與爭強所遭遇異

五月癸丑公會晉侯齊侯宋公蔡侯鄭伯衛子莒子盟于踐土注不致者安信與晉文也盟日者諡也

公朝于王所注不書如不言天子者從外正君臣所以見文公之功餘詳諱例

桓二年戊申宋督弑其君與夷及其大夫孔父傳及者累也何以書賢也孔父可謂義形于色矣注父者字也禮臣死君字之以君得字之知先君死言及者使上及其君若附大國以名通明當封爲附庸不絕其祀所以重社稷之臣也

莊十二年宋萬弑其君接及其大夫仇牧傳賢也仇牧可謂不畏強禦矣注猶乳犬攫虎伏雞搏狸精誠之至也

僖十年晉里克弑其君卓子及其大夫荀息傳賢也荀息可謂不食其言矣注起時莫不背死向生去敗與成荀息一受君命終身死之故言及與孔父同義

桓十一年宋人執鄭祭仲傳鄭相也不名賢也以爲知權也塗出于宋宋人執之謂之曰爲我出忽而立矣祭仲不從其言則君必死國必亡從其言則君可以生易死國可以存易亡少遼緩之則突可故出而忽可故反是不可得則病然後有鄭國古人之有權者祭仲之權是也

突歸于鄭鄭忽出奔衛傳突名挈乎祭仲也言歸順祭仲也

十五年鄭伯突出奔蔡傳名奪正也

鄭世子忽復歸于鄭傳復正也

鄭伯突入于櫟傳不言入于鄭末言爾祭仲亡矣不言忽之出奔言忽爲君之微也祭仲存則存矣祭仲亡則亡矣注皆所以終祭仲之言辟不虛設危險之嫌

莊元年齊師遷紀邢鄆郟

三年紀季以鄆入于齊傳紀侯之弟不名賢也服罪也魯子曰請後五廟以存姑姊妹注紀與齊爲讎不直齊大紀小季知必亡故以存先祖之功除出奔之罪明其知權言入者雖辭賢季有難去兄入齊之心

四年紀伯姬卒紀侯大去其國六月乙丑齊侯葬紀伯姬

十二年三月紀叔姬歸于鄆

二十九年十有二月紀叔姬卒

三十年秋七月齊人降鄆八月癸亥葬紀叔姬

莊二十七年公子友如陳葬原仲傳通乎季子之私行也辟內

難也

詳見公
孫始例

閔元年季子來歸

僖十六年三月壬申公子季友卒傳賢也注閔公不書葬故復
于卒賢之明季子當蒙討慶父之功遏牙存國終當錄也

桓十七年六月丁丑蔡侯封人卒秋八月蔡季白陳歸于蔡注
稱字者封人無子季次當立封人欲立獻舞而疾害季季辟之
陳封人死歸反奔喪思慕三年卒無怨心故賢而字之出奔不

書者方以起季奔喪歸故使若非出奔歸不稱弟者見季不受父兄之尊起宜爲天子大夫天子大夫不得與諸侯親通故魯季子紀季皆去其氏唯卒以恩錄親季友叔肸卒是也

癸巳葬蔡桓侯注稱侯者亦奪臣子辭也有賢弟而不能任用反疾害之而立獻舞國幾并于蠻荆故賢季抑桓稱侯以起其事

僖二十八年晉人執衛侯歸之于京師傳歸之于者罪已定矣

衛侯之罪何殺叔武也不書爲叔武諱也春秋爲賢者諱讓國也詳以誅絕也
例詳例

襄二十九年吳子使札來聘傳吳無君無大夫此有君有大夫賢季子也讓國也春秋賢者不名此何以名許夷狄者不壹而

足也季子所賢也不足乎季子許人臣者必使臣許人子者必使子也注季子讓在殺僚後豫于此賢之者移諱于闔閭不可
以見讓故復因聘起其事

昭二十七年夏四月吳弑其君僚注不書闔閭爲季子諱明季子不忍父子兄弟自相殺讓國闔閭欲其享之故爲沒其罪月者非失衆見弑故不畧之

成十三年曹伯廬卒于師

十五年晉侯執曹伯歸之于京師注爲篡喜時

十六年曹伯歸自京師傳執而歸者名曹伯不名而不言復歸易也公子喜時在內也喜時者仁人也內平其國而待之外治諸京師而免之自京師言甚易也舍是無難矣注與內臣子致

公同文欲言甚易執歸書者賢喜時爲兄所篡終無怨心而復深推精誠憂免其難非至仁莫能行之故書起其功

昭二十年曹公孫會自郟出奔宋傳奔言自畔也不言畔爲公子喜時之後諱也春秋爲賢者諱讓國也君子之善善也長惡惡也短惡惡止其身善善及子孫賢者子孫故君子爲之諱也注以喜時之讓除會之叛不通郟爲國如通濫者喜時本正當立有明王與當還國明叔術功惡相除裁足通濫也

昭三十一年黑弓以濫來奔傳文何以無邾婁通濫也賢者孫宜有地也賢者孰謂謂叔術也讓國也絕之則爲叔術不絕不絕則世大夫也大夫之義不得世故于是推而通之也如不□繫邾婁文言濫黑弓來奔則爲叔術賢心不欲自絕

國又觸天下實有濫無以起新通之文如□不絕邾婁文言邾婁濫黑弓來奔則嫌氏邑起本邾婁世大夫因就大夫竊邑奔文通之則大夫不世叔術賢心不欲自絕兩明矣主書者在春秋前見王者起當追有功顯有德與滅國繼絕世

宣十七年壬午公弟叔肸卒注稱字者賢之宣公篡立叔肸不仕其朝不食其祿終身于貧賤禮盛德之士不名天子士大夫不名春秋公子不爲大夫者不卒卒而字者起其宜爲天子上大夫也孔子曰興滅國繼絕世舉逸民天下之民歸心焉案其因一

事見賢者如齊襄伍員之復世公子結士句都缺之制命子反
華元之專平國佐之不卒命書麇之去君行父之代執嬰齊之
待命歸父之復命曼姑之守義魯莊之追戎
公子手之憂內隨文張叢非特褒不悉載列

釋曰昔者孔子論列春秋列國卿大夫之賢如衛甯俞齊晏

嬰鄭公孫僑之倫詳矣顧于春秋絕少概見何哉蓋春秋垂法萬世不屑屑于一人一事而諸賢又無殊尤絕異之行可以爲世立教故別錄于諸弟子之記其慎也如此是以論王政則曰謹權量審法度修廢官又曰興滅國繼絕世舉逸民六者行而王政立矣春秋譏稅畝田賦謹權量也改制質文審法度也詳官制修廢官也嘉死位興滅國也明氏族繼絕世也褒賢良舉逸民也故王者之治將欲養民興學莫先建侯進邾宿封滕薛明元功也崇紀子廣孝也詳桓文重牧伯也宋襄功未逮而有志焉貴志也楚莊秦穆雖賢僅使之長帥族類相與親諸華漸王化中國之政罔或干焉辨內外也將欲興滅繼絕又莫先辨賢義動天地忠貫日月誠沮金石

貪生惡死之世未之或尙也爲表三人焉曰孔父仇牧荀息
苞桑社稷柱石國家權輕重之義別尊親之倫容悅事君之
朝莫之或究也爲表三人焉曰祭仲紀季季友修明仁義傲
屣千乘忘身以紆難顯功以挾過頑懦鄙薄之俗賴以不亡
也爲表五人焉曰蔡季吳札衛叔武曹喜時邾叔術貪夫高
張廉貞不名舉世混濁清士乃見不滑于物不撓其寧其志
可則其行可尊古之逸民今未見其匹也爲表一人焉曰公
弟叔胙嗚呼智名勇功後世所以開國承家者其秉禮度義
則相與詬病以爲不祥而春秋所貴乎持世乃在此不在彼
爲上可以知取人爲下可以知勉學矣今小民有罪則能以
法治之有善則不能賞而爵祿所及未必非有文無行之士

是以賢不肖混淆而無所懲勸是宜修春秋舉賢之制而唐
宋以來試士之法以次漸廢則朝廷多伏節死義之臣而間
巷多砥行立名之士斯結人心厚風俗存紀綱之要道也

譏例第七

以時月日見
者入彼例

隱五年公觀魚于棠傳譏遠也曷爲遠而觀魚登來之也美大
之之辭也

初獻六羽傳譏始僭諸公也

桓二年取郕大鼎于宋戊申納于太廟傳譏遂亂受賂納于太
廟非禮也

四年春正月公狩于郎傳譏遠也注月者譏不時也

六年大閱傳益以罕書也

案此譏廢
禮餘倣此

八年春正月己卯烝傳譏亟也

夏五月丁丑烝傳譏亟也

十四年秋八月壬申御廩災乙亥嘗傳譏嘗也注當廢一時祭
自責以奉天災也

莊元年築王姬之館于外傳譏築之禮也于外非禮也主王姬
者必爲之改築

三年公次于郎傳刺欲救紀而后不能也

四年公及齊人狩于郕傳于傳者將壹譏而已莫重乎其與魯
狩也

六年齊人來歸衛寶注惡魯犯命復貪利也不爲大惡者納朔
本不以賂行事畢而見謝耳

九年夏公伐齊納糾齊小白入于齊傳伐而言納者猶不能納

案大國集例月註不月者非納集辭小白寡不月後惡于魯也凡昔納者諸侯不得專廢置君以上無天子除之爲小惡糾

非寡則又存亡繼絕之功也故反譏其不能納爲小惡與納衛朔異下殺糾乃爲大惡入諱例

十四年單伯會伐宋傳後會也注刺其不信

十七年鄭瞻自齊逃來傳書甚佞也注痛魯知而受之

二十二年肆大省傳譏始忌省也註哭不辟子卯日所以專孝

子之思也

公如齊納幣傳譏親納幣非禮也

案公一陳佗誅絕之罪外淫大惡諱故傳反不譏喪娶若

僅以非禮譏深諱文

二十三年公如齊觀社傳譏諸侯越竟觀社非禮也注與親納

幣同義

蕭叔朝公傳公在外也注惡公不受于廟

丹桓宮楹傳譏非禮也

二十四年刻桓宮楹傳譏非禮也

八月丁丑夫人姜氏入傳言入言曰難也與公有所約然後入注要公不爲大惡者妻事夫有四義不可純以君臣之義責之大夫宗婦覲用幣傳用者不宜用也非禮也

二十五年秋大水鼓用牲于社于門傳于社禮也于門非禮也二十七年公會杞伯姬于洧注惡公教內女以非禮也伯姬不卒蓋無服

杞伯姬來

案譏失教戒也

公子友如陳葬原仲傳辟內難也注惡莊公不能任用

二十八年臧孫辰告糴于齊傳不稱使以爲臧孫辰之私行也
一年不熟告糴譏也

二十九年新延廡傳譏凶年不修

三十一年築臺于郎傳譏臨民之所激浣也注禮天子外屏諸
侯內屏大夫帷士簾所以防泄慢之漸也

築臺于薛傳譏遠也注禮諸侯之觀不過郊

齊侯來獻戎捷傳威我也注不書威我者恥見輕侮也

案書威魯當如

州公如曹定來之例而發其文曰齊侯來

築臺于秦傳譏臨國也

閔二年吉禘于莊公傳譏始不三年也

僖五年杞伯姬來朝其子傳內辭也與其子俱來朝也注禮外

孫初冠有朝外祖之道故使若來朝其子以殺直來之恥所以避教戒之不明也

八年禘于太廟用致夫人傳用者不宜用也致者不宜致也禘用致夫人非禮也不稱姜氏譏以妾爲妻也

二十年新作南門傳譏門有古常也注惡奢泰不奉古制常法
二十一年楚人使宜申來獻捷注歸捷書者刺魯受惡人物也
二十八年公朝于王所傳不言如京師天子在是也不言天子在是不與致天子也注不書諸侯朝者外小惡不書獨錄內也
王申公朝于王所傳其日錄乎內也注危錄內再失禮將爲有義者所惡

三十一年夏四月卜郊不從乃免牲猶三望傳三卜禮也四

卜非禮也求吉之道三卜郊非禮也魯郊非禮也免牲禮也免牛非禮也傷者曰牛猶者何通可以已也譏不郊而望祭也注譏尊者不食卑者獨食惡失禮也

文元年公孫敖如齊注書者譏喪娶吉凶不相干

案此蓋納采之屬然無變

文從納幣譏之

二年作僖公主傳譏不時也欲久喪而後不能也

大事于太廟躋僖公傳譏逆祀也先禰而後祖也

公子遂如齊納幣傳譏喪娶也二年之內不圖婚

四年逆婦姜于齊傳高子曰娶乎大夫者略之也注賤非所以奉宗廟故略之

六年公子遂如晉葬晉襄公注書遂者刺公生時數如晉葬不

自行非禮也禮諸侯薨使大夫弔自會葬

閏月不告月猶朝于廟傳猶者何通可以已也

九年叔孫得臣如京師辛丑葬襄王注惡文公不自往

十年楚子蔡侯次于厥貉注魯恐故書刺微弱也

十三年世室屋壞傳譏久不脩也

十六年毀泉臺傳未成爲郎臺旣成爲泉臺築之譏毀之譏先祖爲之已毀之不如勿居而已矣注暴揚先祖之惡也

十八年公子遂叔孫得臣如齊注不舉重者譏魯猥使二大夫出虛國家廢政事重錄內也

宣元年公子遂如齊逆女注譏喪娶復書不親迎者嫌觸諱不

成其文也

案八年注遂卒乃既者元年逆女嫌爲喪娶貶也

遂以夫人婦姜至自齊傳不稱姜氏貶譏喪娶也夫人與公一體也

三年郊牛之口傷改卜牛牛死乃不郊猶三望注書者譏宣公養牲不謹敬不潔清而災

八年公子遂如齊至黃乃復傳有疾也譏大夫以君命出聞喪徐行而不反注以喪喻疾

辛巳有事于太廟仲遂卒于垂壬午猶繹萬人去籥傳猶者通可以已也

十五年初稅畝傳譏始履畝而稅也注時宣公無恩信于民不肯盡力于公田故擇其善畝穀取好者稅取之

成元年作丘甲傳譏始邱使也注四邑爲邱使邱民作鎧也古

者四民不相兼然後財用足

二年季孫行父臧孫許叔孫僑如公孫嬰齊帥師注魯舉四大夫惡內多虛國家悉出用兵

六年立武宮傳立者不宜立也非禮也

十五年仲嬰齊卒傳公孫嬰齊也謂之仲嬰齊爲見歸父後也爲人後者爲之子也注更爲公孫之子故不得復氏公孫其稱仲何孫以王父字爲氏也注弟無後兄之義爲亂昭穆之序失父子之親故不言仲孫明不與子爲父孫

十七年九月辛丑用郊傳用者不宜用也九月非所用郊也郊用正月上辛注三王之郊一用夏正言正月者春秋之制也

案傳

正月亦謂夏正

十八年築鹿囿傳譏有囿矣又爲也注刺奢泰妨民

案昭九年
郎定十

三年蛇淵

圖同例

襄元年仲孫蔑會齊崔杼曹人邾婁人杞人次于合注刺欲救
宋而後不能也知非救鄭者鄭昔中國不能救不得刺

十一年作三軍傳譏古者上卿下卿上士下士注踰王制故譏
之

二十一年邾婁庶其以濼閭邱來奔傳邾婁無大夫書重地也
注惡受叛臣邑

二十三年叔孫豹帥師救晉次于雍渝傳先言救而後言次先
通君命也注惡其不遂君命而專止次故先通君命言救

二十九年春王正月公在楚傳正月以存君也注成十一年在

晉不書在楚書首惡襄公久在夷狄爲臣子危錄之

三十一年公薨于楚宮注公朝楚好其宮歸而作之故名之作不書首見者不復見

昭元年取運注不言叛者爲內諱不先以文德來之而便以兵取之當與外取邑同罪

叔弓帥師疆運田傳與莒爲竟也帥師而往畏莒也注刺魯微弱失操煩擾百姓

五年莒牟夷以牟婁及防茲來奔傳莒無大夫重地也案與濼問邱同

八年蒐于紅傳以罕書也

十一年大蒐于比蒲傳以罕書也

二十六年公圍成注書者惡公失國幸而得還復擾其民

三十年春王正月公在乾侯注明臣子當憂綱之

定元年公之喪至自乾侯注非公事齊不專中去之晉竟不見容死于乾侯

立煬宮傳立者不宜立也非禮也

二年新作雉門及兩觀傳脩大也譏不務公室也注不務公室亦可施于久不脩亦可施于不務如公室之禮微辭也

六年季孫斯仲孫忌帥師圍運傳此仲孫何忌也譏二名非禮也注爲其難諱也

九年齊侯衛侯次于五氏注善魯却難早

案當與厥躬同義

十年齊人來歸運謹龜陰田注歸濟西不言來此言來者已絕

不應復得故從外來常文

十四年天王使石尙來歸賑注時魯不助祭而歸之故書以譏之

大蒐于比蒲注譏亟也

案與十三年大蒐于比蒲爲亟

十五年癸鼠食郊牛牛死改卜牛傳不言所食漫也注災不敬也

公羊何氏釋例卷三終

春秋公羊經何氏釋例卷四

武進劉禮部

逢祿

申受著

貶例第八

隱二年無駭帥師入極傳不氏貶疾始滅也

三年尹氏卒傳貶譏世卿註不官不名

四年翬帥師傳不稱公子貶與弑公也

八年無駭卒傳疾始滅也故終其身不氏註嫌上貶起入爲滅

故復爲終身貶之足見上貶爲疾始

十年翬帥師傳隱之罪人也故終隱之篤貶也註嫌上一貶可

移於他事

桓四年天王使宰渠伯糾來聘

案注每以去時爲貶傳所謂不貶絕以見罪惡也詳時月日例

劉禮部公羊何氏釋例

大清樓

又案傳無以王不稱天爲貶之義
故莊九年文五年經注詳譏例

十有一年柔會宋公陳侯蔡叔盟于折注蔡侯稱叔者以不能
防正其姑姊妹使淫於陳佗故貶在字例

莊元年夫人孫于齊傳不稱姜氏貶與弒公也注貶者見王法
所當誅

十七年齊人執鄭詹傳此鄭之微者言齊人執之書甚佞也注
不得爲伯討者罪未成伯當遠之而已

三十年齊人伐山戎齊侯來獻戎捷傳齊侯也其稱人貶子司
馬子曰蓋以操之爲已蹙矣

僖元年齊師宋師曹師次于聶北救邢傳先言次後言救君也

其稱師諸侯之義不得專封也注道太平制

案二年城楚邱十
四年城緣陵不言

桓公
同義

夫人氏之喪至自齊傳不稱姜氏貶與弒公也不於其弒焉貶
貶必於重者莫重乎其以喪至也

四年齊人執陳袁濤塗傳不脩其師而執濤塗古人之討則不

然也

案二十八年注無罪而執人常貶稱人

八年禘于太廟用致夫人傳不稱姜氏貶譏以妾爲妻也

十有九年宋人執滕子嬰齊注名者叛天子命者也不得爲伯
討者妾執之著有罪者爲襄公殺恥

二十有一年楚人使宜申來獻捷傳楚子也

注據稱使

貶爲執宋公

貶注詐劫諸侯求其國當絕故貶

二十有七年楚人陳侯蔡侯鄭伯許男圍宋傳爲執宋公貶故

終僖之篇貶也

二十八年晉侯齊師宋師秦師及楚人戰于城濮楚師敗績楚殺其大夫得臣傳其稱人貶大夫不敵君也注臣無敵君戰之義又注不氏者子玉得臣楚之驕蹇臣數道其君侵中國故貶明當與君俱治也

晉人執衛侯歸之于京師傳歸之于者罪已定矣歸于者罪未定也衛侯之罪殺叔武也此晉侯也其稱人貶文公逐衛侯而立叔武使人兄弟相疑放乎殺母弟者文公爲之也注逐之文不見故貶

三十三年晉人及姜戎敗秦于殽傳襄公親之稱人貶君在乎殽而用師危不得葬也

文七年晉人及秦人戰于合狐晉先昧奔秦傳先昧也稱人貶以師外也

十四年晉人納接菑于邾婁弗克納傳此晉卻缺也貶不與大夫專廢置君也

宣元年遂以夫人婦姜至自齊傳不稱姜氏貶譏喪娶也喪娶者公也易爲貶夫人內無貶於公之道夫人與公一體也

晉趙盾帥師救陳宋公陳侯衛侯曹伯會晉師于斐林伐鄭傳不言趙盾之帥君不會大夫之辭也注諸侯爲盾所會不與卑

致尊

案與得臣同義

七年仲遂卒于垂傳公子遂也不稱公子貶爲弒子赤曷爲不於其弒焉貶於文則無罪於子則無年

十年齊崔氏出奔衛傳貶譏世卿

十一年楚人殺陳夏徵舒丁亥楚子入陳傳其稱人貶不與外討也雖內討亦不與也諸侯之義不得專討也

十五年宋人及楚人平傳大其平乎已也此皆大夫也其稱人貶平者在下也注譏二子在君側不先以便宜反報歸美於君而生事專平故貶稱人

成二年公會楚公子嬰齊于蜀丙申公及楚人秦人宋人陳人衛人鄭人齊人曹人邾婁人薛人鄆人盟于蜀傳此楚公子嬰齊也其稱人得一貶焉爾

成四年鄭伯伐許注未踰年君稱伯者時樂成君位親自伐許

故如其意以著其惡

案發其子稱

襄二十六年晉人執衛甯喜傳執有罪不得爲伯討不以其罪執之也

襄三十年晉人齊人宋人衛人邾人曹人莒人邾婁人滕人薛人杞人小邾婁人會于澶淵宋災故傳此大事也曷爲使微者卿也其稱人貶卿不得憂諸侯也注時雖各諸侯使之恩實從卿發故貶起其事明大夫之義得憂內不得憂外所以抑臣道也宋憂內并貶者非救危亡禁作福也

辨見箋

昭元年叔孫豹會晉趙武楚公子圍齊國酌宋向戌衛石惡陳公子招蔡公孫歸生鄭軒虎許人曹人于渚傳此陳侯之弟招也不稱弟爲殺世子偃師貶不予弑焉貶以親者弑然後其罪惡甚春秋不待貶絕而罪惡見者不貶絕以見罪惡也貶絕然

後罪惡見者貶絕以見罪惡也招之罪已重矣曷爲復貶乎此言楚之托乎討招以滅陳也

定元年晉人執宋仲幾于京師傳其言于京師伯討也其稱人貶大夫之義不得專執也注辟諸侯也不言歸者諸侯當決于天子犯之惡甚故錄所歸大夫當決主獄爾犯之罪從外小惡不復別也

四年楚人圍蔡注囊瓦稱人者楚爲無道拘蔡昭公數年而復怒蔡歸有言伐之故貶明罪重於圍

誅絕例第九

隱四年戊申衛州吁弑其君完傳以國氏當國也注與段同義九月衛人殺州吁于濮傳稱人討賊之辭也注明國中人人得

討之所以廣忠孝之路

冬十有二月衛人立晉傅立者不宜立也稱人衆立之之辭也
注明下無廢上之義聽衆立之篡也立納八皆爲篡

桓二年戊申宋督弑其君與夷及其大夫孔父注督不氏者起
馮當國

十一年宋人執鄭祭仲注不稱公者魯鄭立篡首惡當誅非伯

執也

案非伯討者不盡
八誅例當案罪狀

突歸于鄭傳突何以名孳乎祭仲也言歸順祭仲也

鄭忽出奔衛傳忽何以名春秋伯子男一也辭無所貶

十五年鄭伯突出奔蔡傳名奪正也注明祭仲得出之不以失

衆錄也

鄭世子忽復歸于鄭傳復歸者出惡歸無惡復八者出無惡八有惡八者出八惡歸者出八無惡稱世子復正也

許叔八于許注稱叔者春秋前失爵在字例也八者出八惡明當誅也

鄭伯突八于櫟傳不言八于鄭祭仲亡矣不言忽之出奔言忽爲君之微也祭仲存則存矣祭仲亡則亡矣

十六年衛侯朔出奔齊傳名絕之得罪於天子也注衛侯出奔楚不名

莊六年衛侯朔八于衛傳名絕之犯命也注据衛侯八于陳儀不名其言八篡辭也注上辟王不得言納故復書八不直言篡事各有本也殺而立者不以當國之詞言之非殺而立者以當

國之詞言之國人立之曰立他國曰納從外曰八有屬託力加
自文也

九年公伐齊納糾齊小白八于齊齊人取子糾殺之傳脅我使
我殺之也稱子糾宜爲君者也注魯爲齊殺之皆當坐弑君因
解上納糾不爲篡所以理嫌疑也

十一年甲午宋萬弑其君接及其大夫仇牧注爭搏弑君而以
當國言之者重錄彊禦之賊禍不可測明當防其重者急誅之
宋萬出奔陳注弑君復見重錄彊禦之賊明當急誅之

二十五年衛侯朔卒注春秋篡明者富書葬朔不案不字書葬

嫌與篡同例身絕國不絕故去葬明犯天子命重不得書葬與

盜國同

案盜國者并絕國

僖九年晉里克弑其君之子奚齊傳殺未踰年君之號也

十年晉里克弑其君卓子及其大夫荀息

晉殺其大夫里克傳里克弑二君不以討賊之辭言之惠公之

大夫也孰立惠公里克也不言惠公之八踊爲文公諱也

二十四年晉侯夷吾卒注篡故不書葬明當絕也

楚人圍陳納頓子于頓注前出奔當絕還入爲盜國當誅楚納

之與之同罪也

文元年丁未楚世子商臣弑其君髡注楚無大夫言世子者甚

惡世子弑父之禍君之於世子有父之親有君之尊又責臣子

當討賊也

十四年齊侯潘卒注不書葬者立儲嗣不明使臨葬更相篡弑

故絕其身明當更立其先君之後

齊公子商人弑其君舍傳未踰年之君言弑其君舍已立之已殺之成死者而賤生者也

十六年宋人弑其君處曰傳大夫弑君稱名氏賤者窮諸人大夫相殺稱人賤者窮諸盜注降大夫使稱人降士使稱盜者所以別死刑有重輕也

十八年齊人弑其君商人注商人弑君賊復見者與大夫異齊人已君事之殺之且當坐弑君

莒弑其君庶其傳稱國以弑者衆弑君之辭注舉國以明失衆當坐絕也

宣二年晉趙盾弑其君夷獯

六年晉趙盾衛孫免侵陳傳趙盾弑君復見何親弑君者趙穿也加之趙盾不討賊也注君雖不君臣不可以不臣

襄十四年衛侯衎出奔齊注不書孫甯逐君者舉君出爲重

二十五年衛侯入于陳儀傳不言入于衛諼君以弑也注未得國言入起詐篡從此始

二十六年衛甯喜弑其君剽衛孫林父入于戚以叛甲午衛侯衎復歸于衛傳此諼君以弑其言復歸惡剽也不言剽之立以惡衛侯也注不舉衎弑諼成於喜孫林父本逐衎衎得誅之衎名者起盜國盜國明則復歸爲惡剽出見矣

二十九年閻弑吳子餘祭傳門人也刑人也近刑人輕死之道也注不言其君者公家不畜士庶不友故不繫國

三十一年莒人弑其君密州注莒子納去疾及展立莒子廢之
展因國人攻莒子殺之去疾奔齊稱人以弑者莒無大夫密州
惡民所賤故稱國以弑之

昭元年莒去疾自齊入于莒莒展出奔吳注主書去疾者重篡
也莒無大夫書展者起與去疾爭篡當國言自齊者當坐有力
也皆不氏者當國不從莒無大夫去氏者莒殺意恢稱公子篡
重不嫌本不當氏

八年陳侯之弟招殺陳世子偃師注變其言陳者起招致楚滅

陳自此始案元年傳云大夫相殺稱人比其稱名氏以
弑言將自是弑君也君親無將將而誅焉

楚師滅陳執陳公子招放之于越殺陳孔瑗葬陳哀公注不舉
滅爲重復書三事言執者疾諉託義故列見之託義不先書者

本懷滅心

十二年齊高偃帥師納北燕伯于陽注惡納篡也不書所篡出奔者微國雖未踰年君猶不錄

十三年楚公子比自晉歸于楚弑其君虔于乾谿傳其言歸無惡于弑方也靈王無道作乾谿之臺三年不成楚公子棄疾脅比而立之然後令于乾谿之役曰比已立矣後歸者不得復其田里衆罷而去之靈王經而死

楚公子棄疾弑公子比傳比已立矣稱公子其意不當也曷爲加弑比之義宜乎效死不立大夫相殺稱人其稱名氏以弑言將自是爲君也

十九年許世子止弑其君買葬許悼公傳賊未討書葬不成乎

弑也止進藥而藥殺也加弑譏子道之不盡也曰許世子止弑其君買是君子之聽止也葬許悼公是君子之赦止也注明止但得免罪不得繼父後許男斯代立無惡文是也

二十一年冬蔡侯朱出奔楚注爲東國所篡

見日月例

二十三年蔡侯東國卒于楚注不書葬篡也不書篡者以惡朱失衆見篡

二十二年劉子單子以王猛居于皇傳稱王猛

注已葬當稱子

當國也

注不舉猛爲重者時猛尙幼以二子爲計勢故加以二子不舉重尊同權等

劉子單子以王猛入于王城傳言入篡辭也

冬十月王子猛卒傳此未踰年之君其言王子猛卒何

注子卒不名外

未喻年不與當父死子繼兄死弟及之辭也
君不卒

二十三年尹氏立王子朝注王子朝不貶者年未滿十歲未知
欲富貴不當坐明罪在尹氏

二十六年天王入于成周尹氏召伯毛伯以王子朝奔楚注本
在尹氏當先誅渠率後治其黨猶楚嬰齊

二十七年夏四月吳弑其君僚注不舉專諸起闔閭當國不書
闔廬爲季子諱

定十四年衛世子蒯聵出奔宋注主書者子雖見逐無去父之
義

哀二年晉趙鞅帥師納衛世子蒯聵于戚傳不言入于衛父有
子子不得有父也注父得有子而廢之子不得有父之所有故

奪其國文不貶蒯瞶者嫌曼姑可爲輒誅之輒出奔不書者不責拒父主書者與頓子同

三年齊國夏衛石曼姑帥師圍戚傅伯討也曼姑受命乎靈公而立輒以曼姑之義爲固可以拒之也注義不可爲子誅父故但得拒之

四年盜殺蔡侯申傳稱盜賤乎賤者也謂罪人也注不言其君與刑人義同

葬蔡昭公注賊已討故書葬也不書討賊者明諸侯得專討士以下也

六年齊陽生入于齊齊陳乞弑其君舍傳弑而立者不以當國之辭言之

注据公子商人

此以當國之辭言之爲諉也注不舉陽生弑

者諼成於乞

右篡弑

隱元年鄭伯克段于鄆傳殺之也謂之克大鄭伯之惡也母欲立之已殺之如勿與而已矣段不稱弟當國也其地當國也注不當自己行誅殺使執政大夫誅之

莊二十二年陳人殺其公子禦寇注書者殺君之子重也

突不言大

夫者未爲大夫不言世子者未爲命嗣蓋疑於命嗣而相殺也

二十六年曹殺其大夫傅不名衆也不死於曹君者也注曹無大夫書殺者起當誅也

僖五年晉侯殺其世子申生傳殺世子母弟直稱君者甚之也

九年晉侯詭諸卒注不書葬者殺世子

案襄二十六年宋公殺其世子痤注痤有罪故

平公
普葬

七年鄭殺其大夫申侯傳稱國以殺君殺大夫之辭也

三十年衛殺其大夫元咺及公子瑕衛侯鄭歸于衛傳衛侯未至其稱國以殺道殺也注坐與至國同

三十二年鄭伯捷卒注不書葬者殺大夫申侯也君殺大夫皆就葬別有罪無罪惟內不可去葬故就殺特別之

文六年晉殺其大夫陽處父晉狐射姑出奔狄傳射姑殺也其稱國君漏言也

宣十五年王札子殺召伯毛伯注惡天子不以禮尊之而任以權至令殺尊卿大夫相殺不稱人者正之諸侯大夫顧弑君重故降稱人王者至尊不得顧

成十五年宋華元出奔晉宋華元自晉歸于宋宋殺其大夫山
宋魚石出奔楚注復出宋華元者以憂國爲山所譖出奔晉人
理其罪宋人反之而誅山故繁文大之歸者出人無惡山不氏
嫌直自見殺故貶之明以譖華元魚石與山有親恐見及也後
言復入者出無惡知非君漏言魚石不殺山

十八年楚子鄭伯伐宋宋魚石復入于彭城注不書叛者本受
於楚非得於宋繫宋言復入者不與楚專封故從犯君錄之
襄元年仲孫蔑會晉欒黶宋華元衛甯殖曹人莒人邾婁人滕
人薛人圍宋彭城傳爲宋誅也魚石走之楚爲之伐宋取彭城
以封魚石魚石之罪奈何以入是爲罪也楚已取之矣繫之宋
不與諸侯專封也

二十三年陳殺其大夫慶虎及慶寅陳侯之弟光自楚歸于陳
注宋大夫山譖華元貶此不貶者殺二慶而光歸譖光可知

晉欒盈復入于晉入于曲沃傳入晉不納由乎曲沃而入也注
曲沃大夫當坐

晉人殺欒盈傳不言殺其大夫非其大夫也注大其除亂

二十七年衛殺其大夫甯喜衛侯之弟鱄出奔晉傳喜欲納公
公使鱄約之注獻公無信鱄兄爲彊臣所逐既不能救又移心
事剽背爲姦約獻公雖復因喜得反誅之小負未爲大惡而深
以自絕所謂守小信而忘大義徇小介而失大忠

三十年天王殺其弟年夫注王者得專殺書者惡失親親也未
三年不去王者方惡不思慕而殺弟不與子行也昔殺意恢以

矢子行錄設但殺弟不書也不爲諱者年夫有罪

昭十四年莒殺其公子意恢注莒無大夫書殺公子者未踰年而殺其君之子不孝尤甚

右殺大夫

世子母弟附大夫相殺附

昭七年楚子蔡侯陳侯許男頓子胡子沈子淮夷伐吳執齊慶封殺之傳爲齊誅也慶封走之吳吳封之于防不言伐防不與諸侯專封也慶封之罪何脅齊君而亂齊國也

右伯討

桓六年蔡人殺陳佗傳陳君也謂之陳佗絕也

註國當絕

曷爲絕之

淫乎蔡蔡人殺之注從討賊辭去爵者起其見卑賤猶律文立子姦母見乃得殺之也

十二年陳侯躍卒注不書葬者佗子也佗不稱侯者嫌貶在名
例不當絕故復去躍葬也

案莊二十三年祭叔來聘注不稱使者公一陳佗故絕使若我無君因不

與天子下
聘小人

僖十九年邾婁人執郈子用之傳蓋叩其鼻以血社也注惡無
道也不言社者本無用人之道言用之已重矣故絕其所用處
也

宣十八年邾婁人戕郈子于郈傳殘賊而殺之也注支解節斷
之故變殺言戕惡無道也言于郈者刺無守備

昭十一年楚子虔誘蔡侯般殺之于申傳虔何以名絕之爲其
誘詞也懷惡而討不義君子不與也注內懷利國之心而外託
討賊故不予其討賊而責其誘詐也

楚師滅蔡執蔡世子有以歸用之傳此未踰年之君稱世子何不君靈公不成其子也誅君之子不立非怒也無繼也注父誅子富絕

十三年葬蔡靈公注經不與楚討嫌本可責復讐故書葬明當從誅君論之不得責臣子

十六年楚子誘戎曼子殺之傳楚子何以不名夷狄相誘君子不疾也若不疾乃疾之也注顧以無知薄責之

右諸侯相殺

僖二十四年天王出居于鄭傳王者無外其言出不能乎母也注罪莫大於不孝故言出絕之也下無廢上之義得絕之者明母得廢之臣下得從母命

隱元年祭伯來傳奔也注去奔明王者以天下爲家無絕義

案此

謂天子之臣與侯國臣異無自絕之義若其出奔則與寓公同義不繼世絕也凡書奔皆絕例仿此

成十有二年周公出奔晉傳其言出自其私土而出也注此起諸侯八爲三公也明當并絕其國

僖二十八年衛侯出奔楚注晉文逐之不書逐之者以王事逐之擇立其次無絕衛之心惡不如出奔重

衛侯鄭自楚復歸于衛注言復歸者天子有命歸之名者刺天子歸有罪也言自楚爲天子諱

衛元咺出奔晉○晉人執衛侯歸之于京師○衛元咺自晉復歸于衛傳自者有力焉者也爲叔武爭也注臣無訟君之義故著言自明不當有力於惡人也言復歸者深爲霸者恥之使若

無罪

案當是移忠於衛侯鄭

衛殺其大夫元咺及公子瑕傳衛侯未至稱國以殺道殺也注坐與至國同

三十年衛侯鄭歸于衛傳其言歸歸惡乎元咺也注元咺有出八罪衛侯得殺之所以專臣事君之義

宣十八年公孫歸父如晉歸父還自晉至筮遂奔齊傳還善辭也聞君薨家遣墮帷哭君成踊反命乎介自是走之齊注言遂者不待報罪也遂弑君本當絕小善錄者本宣公同篡之人父不當逐不日者伯討可逐故從有罪例

昭元年秦伯之弟鍼出奔晉傳仕諸晉也有千乘之國而不能容其母弟故君子謂之出奔也注與逐之無異

十有五年蔡朝吳奔鄭注不言出者始封名言歸嫌與天子歸有罪同故奪其國辭明專封

二十年曹公孫會自鄆出奔宋傳畔也

八諱例

冬十月宋華亥向甯華定出奔陳

見口月例

二十一年宋華亥向甯華定自陳入于宋南里以叛傳宋南里者若曰因諸者然注因諸者齊刑人之地以齊喻也叛臣從刑人於國家尤危故重舉國

二十二年宋華亥向甯華定自宋南里出奔楚注前出奔已絕賤復錄者以故大夫專勢入南里犯君而出當誅也

定十年宋樂世心出奔曹宋公子池出奔陳 宋公之弟辰暨宋仲佗石軀出奔陳

十一年宋公之弟辰及仲佗石彊公子池自陳入于蕭以叛

宋樂世心自曹入于蕭注不言叛者從叛臣可知

十三年秋晉趙鞅入于晉陽以叛冬晉荀寅及士吉射入于朝歌以叛晉趙鞅歸于晉傳叛言歸以地正國也以叛言之無君命也注君子誅意不誅事

辨見箋

右王侯大夫奔叛

閔二年鄭棄其師傅鄭伯惡高克使之將逐而不納棄師之道也注不書逐高克舉棄師爲重

文七年晉人及秦人戰于令狐晉先昧奔秦傳不言師敗績敵也不言出遂在外也注本所以懷持二心者其咎亦由晉侯要以無功當誅也

宣元年晉放其大夫胥甲父于衛傳君放之非也大夫待放正也

哀三年蔡人放其大夫公孫獵于吳注稱人者惡大夫驕蹇作威相放當誅故貶

右逐大夫

宣十一年楚子入陳納公孫甯儀行父于陳傳此大夫也言納納公黨與也注据納謂已絕也

右納大夫

僖三十年公子遂如京師遂如晉傳大夫無遂事其言遂公不得爲政爾注當絕

宣八年公子遂如齊至黃乃復注言乃不言有疾有疾猶不得

反也敖不言乃者明無所難爲重敖當誅遂當絕

案敖八諱例

仲遂卒于垂注貶加字者起嬰齊所氏明爲歸父後大宗不得

絕也

見取例

襄十二年季孫宿帥師救台遂入鄆傳其言遂公不得爲政耳

右大夫專命

隱二年無駭帥師八極傳此滅也言八內大惡諱也

十年宋人蔡人衛人伐載鄭伯伐取之傳其言伐取之易也因

宋人蔡人衛人之力也

莊十年宋人遷宿傳以地還之也注宋當坐滅人宿不能死社

稷當絕也

齊師滅譚譚子奔莒傳不言出國已滅無所出也注惡不死位

僖二年虞師晉師滅下陽傳虞微國也序乎大國之上使虞首惡也虞受賂假滅國者道以取亡焉

三年徐人取舒傳其言取易也注猶無守禦之備

五年晉人執虞公傳虞已滅矣其言執不與滅也滅者亡國之善辭也上下之同力者也注不但去滅復去以歸言執者明虞公滅人以自亡當絕不得責不死位也晉稱人者本滅而執之不以王法執伯之虞稱公者奪正爵起從滅也

二十五年衛侯燬滅邢傳名絕之滅同姓也注絕先祖支體尤重

二十六年楚人滅隗以隗子歸注不言獲者舉滅爲重書以歸者惡不死位不名者所傳聞世見治始起責小國略但絕不誅

之

宣十五年晉帥滅赤狄潞氏以潞子嬰兒歸注錄以歸者因可

責而責之責而加進之者謂稱子明不當絕當復其祀

襄六年莒人滅郕注莒稱人者莒公子郕外孫稱人者從莒無大夫也言滅者以異姓爲後莒人當坐滅也

齊侯滅萊傳不言萊君出奔國滅君死之正也注明國當存不

書殺萊君者舉滅國爲重案相殺者誅滅人者絕

定四年蔡公孫歸姓帥師滅沈以沈子嘉歸殺之注不舉滅爲重書以歸殺之者責不死位也

十四年楚公子結陳公子佗人帥師滅頓以頓子嬖歸注不別以歸何國者明楚陳以滅人爲重頓子以不死位爲重

哀七年公伐邾婁八月己酉入邾婁以邾婁子益來傳名絕之
獲也

八年宋公入曹以曹伯陽歸傳名絕之滅也

莊十年荆敗蔡師于莘以蔡侯獻舞歸傳名絕之獲也不言獲
不與夷狄之獲中國也

僖十五年晉侯及秦伯戰于韓獲晉侯傳偏戰不言師敗績君
獲不言師敗績也注見獲及獲人君者皆當絕也

成二年季孫行父臧孫許叔孫僑如公孫嬰齊帥師會晉郤克
衛孫良夫曹公子手及齊侯戰于鞏齊師敗績秋七月齊侯使
國佐如師傳君不使乎大夫此其行使乎大夫注晉郤克爲主佚獲也

注已獲而逃亡也當絕賤

宣二年宋華元帥師及鄭公子歸生帥師戰于大棘宋師敗績
獲宋華元注復出宋者非獨惡華元明恥辱及宋國

襄八年鄭人侵蔡獲蔡公子燮傳侵而言獲者適得之也注將
兵禦難不明候伺雖不戰鬪當坐獲

昭二十三年戊辰吳敗頓胡沈蔡陳許之師于雞父胡子髡沈
子逞滅獲陳夏齧傳偏戰也以詐戰之辭言之不與夷狄之主
中國也不使中國主之中國亦新夷狄也君死乎位曰滅生得
曰獲大夫生死皆曰獲不與夷狄之主中國言獲何吳少進也
注能結日偏戰行少進

右滅獲

僖四年蔡潰傳下叛上也國曰潰邑曰叛

十四年蔡侯肸卒注不書葬潰當絕也肸立不書者父獻舞見獲留卒于楚肸次立非篡也

十九年梁亡傳自亡也注明百姓得去之君當絕者

右潰亡

桓七年穀伯綏來朝鄧侯吾離來朝傳名失地之名也注見不世也獨妻得配夫託衣食于公家子孫當受田而耕故云爾莊二十四年赤歸于曹郭公傳曹無赤者蓋郭公也失地之君也

僖二十年邾子來朝傳失地之君也不名兄弟辭也注不忍言其絕賤明當尊遇之異于鄧穀

右失地君

昭十三年蔡侯廬歸于蔡陳侯吳歸于陳傳此滅國也言歸不與諸侯專封也注名者專受其封當誅所以能起楚封也陳無君無所責蔡本以篡見殺但不成其子不絕其國卽諸侯存之當有文實也

右復封

隱七年戎伐凡伯于楚邱以歸

宣元年晉趙穿帥師侵柳傳天子之邑也不繫乎周不與伐天子也注絕正其義使若兩國自相伐

成元年王師敗績于貿戎傳晉敗之或曰貿戎敗之不言敗之王者無敵莫敢當也

昭二十三年晉人圍郊注與侵柳同義

右伐上

襄十六年晉人執莒子邾婁子以歸注錄以歸者甚惡晉有罪無罪皆當歸京師不得自治之

右叛上

桓十五年邾婁人牟人葛人來朝傳皆稱人夷狄之也注桓公行惡而朝事之三人爲衆足責故夷狄之

僖十五年楚人敗徐于婁林注謂之徐者爲滅杞不知尊先聖法度惡重故狄之也不月者略兩夷狄

文七年徐伐莒注謂之徐者前共滅王者後今先自犯文對事連可以起同惡莒在下不得狄故復狄徐也一罪再狄者明爲莒狄之爾

成三年鄭伐許注謂之鄭者惡鄭襄公與楚同心數侵伐諸夏自此之後中國盟會無已兵革數起夷狄比周爲黨故夷狄之襄五年公會晉侯宋公陳侯衛侯鄭伯曹伯莒子邾婁子滕子薛伯齊世子光吳人郟人于戚注方以吳抑郟國故進稱人經書莒人滅郟又與巫詎巫當存惡郟文不見見惡必以吳者夷狄尙知父死子繼故以甚郟也不使郟稱國者郟不如夷狄故不得與夷狄同文

昭十二年晉伐鮮虞注謂之晉者中國以無義故爲夷狄所強今楚行詐滅陳蔡諸夏懼然去而與晉會于屈銀不因以大綏諸侯先之以博愛而先伐同姓從親親起欲以立威行霸故夷狄之

二十三年戊辰吳敗頓胡沈蔡陳許之師于雞父傳偏戰也以詐戰之辭言之不與夷狄之主中國也不使中國主之中國亦新夷狄也注中國所以異乎夷狄者以其能尊尊也王室亂莫肯救亦新有夷狄之行故不使主之不稱國國出師者賤略之

右狄中國

哀四年晉人執戎蠻子赤歸于楚傳赤者何戎蠻子之名也子北宮子曰辟伯晉而京師楚也注使若晉非伯執而赤微者自歸于楚主書者惡晉背叛當誅之

十三年公會晉侯及吳子于黃池傳吳稱子主會也先言晉侯不與夷狄之主中國也言及會兩伯之辭也

注事實不可廢奪故使若晉主會爲

伯吳亦主會爲伯

重吳也

注舉晉者諱而不盈

吳在是天下諸侯莫敢不

至也注以晉大國尚猶汲汲于吳則知諸侯莫敢不至也不書諸侯者微辭使若天下盡會之而魯侯蒙俗會之者惡愈主書者惡諸侯君事夷狄

右吳楚王

釋曰貶絕者所以詰奸慝除亂賊也自王綱不振小雅盡廢疆大兼并君臣放弑諸侯奔走不得保其社稷者不可勝數極于中國微滅吳楚狎主而三代之彝倫法制數壞簡棄無復存者蓋夏商之末失以強而周之末失以弱強則去之也驟而湯武之反正也亦易弱則陵夷衰微而天下之思治也亦難厲幽之亡不生孔子天將以春秋之制統三王而正萬世也周之衰也始則禮樂征伐自諸侯出而專封專討天子

不能問也。繼則自大夫出而擅作威福。君若贅旒。下至陪臣效尤。而阜隸輿臺。啟假威坐床之疊。外至四夷。乘便而文身。左衽張僭。號爭長之心。其在周易坤之初曰履霜。堅冰至言。微陽入而陰始凝。馴至其道則无成而代有終也。夫子遂爲之極其義曰。臣弑其君。子弑其父。非一朝一夕之故。其所由來者漸矣。由辨之不早辨也。于豐之言。妃主當國。夷主持世。則又徵其詞曰。日中則昃。月盈則蝕。天地盈虛。與時消息。盛哉扶陽抑陰之心。輔相天地之道。歷萬世而不可變也。然猶以爲託之空言。不如見諸行事之深切著明。于是受命制作。取百二十國之寶書。斷二百四十二年之行事。上誅平王而下及于庶人。內誅魯公而外及于吳楚。雖冒萬世之罪而不

敢避曰備矣夫醫者之治疾也不攻其病之已然而攻其受病之處小雅盡廢亂賊所以橫行也春秋欲攘蠻荆先正諸夏欲正諸夏先正京師欲正士庶先正大夫欲正大夫先正諸侯欲正諸侯先正天子京師天子之不可正則託王於魯以正之諸侯大夫之不可正則託義于其賢者以悉正之曰諸侯不死位者絕其身雖魯隱之賢猶不得免于貶况蔡獻舞管夷吾齊無野之屬乎曰諸侯出奔者絕其國雖魯定之親猶不得免于盜况衛剽蔡東國之屬乎曰諸侯義不得專封雖齊桓之存三亡猶棄疾之封陳蔡也曰諸侯義不得專討雖楚莊之殺徵舒猶靈王之戮招瑗也曰諸侯不得專地以湯沐易朝宿猶晉之侵柳園邾也曰卿不得憂諸侯雖趙

武貶也曰大夫不得專廢置雖郤缺貶也曰大夫不得專執
雖韓不信貶也曰大夫不敵君以戰則貶得臣而荀休父之
亢顯矣曰君不會大夫則貶趙盾而楚嬰齊齊世子光之驕
蹇顯矣曰大夫不得專平則貶子反而溴梁之偏刺顯矣曰
卿大夫不得世而弑光立朝之萌見矣曰君親無將則陳招
之殺世子假帥楚棄疾之殺公子比猶弑君也曰大夫無遂
事則仲遂之弑亦先見于如晉隱如之遂君先見于宿之入
運也曰孝子之義宜衛疾則許止之進藥猶商臣蔡般也曰
大臣之義宜討賊則趙盾之復國猶甯宮崔杼也曰人臣知
賊而不言當誅則叔孫得臣猶齊慶封也曰與于弑君者皆
誅則文姜可絕而齊誅哀姜不得讐也

蔡索書弁與哀姜書葬同義

曰不

能乎親者皆絕則天王可廢而衛討蒯曠乃爲義也曰犯命
浴國者誅而絕其後則衛朔之篡明去葬罪加于邾與衍也
夷吾篡不
明去葬曰誅君之子不立則楚旅之不得繼商臣猶蔡有
之不得繼般也曰殺世子母弟罪加于尊殺大夫則鄭莊宋
平之刑當其罪猶宜絕而詭諸之不葬則誅也曰滅同姓者
罪加于滅人則魯衛之國宜奪而同與燬之身必誅也曰潰
亡者不復興則蔡肸之去葬宜絕而梁與沈之失民同罪也
曰皆殞用師者貶則鄭費晉讎之奪爵而周殺年夫昌殺意
恢之失親同罪也曰弑未踰年君與成君同則里克商人之
罪著而仲遂誅也曰弑弑君而立者與成君同則邴歇闞職
且不得託于討賊而棄疾篡也曰弑無道之君不得以國人

爲辭則晉趙盾楚比之罪定而夷獯楚凌猶庶其用蒲密州
薛比也曰立其所宜立不得以反正爲辭則甯喜陳乞之罪
定而衍與陽生猶突與小白也曰誅其所當誅不得以討賊
爲解則里克甯喜仍繫大夫而翬遂之稱公子罪有主也曰
討其所當討不得以伯討爲解則滅陳滅蔡先正其名而陳
招蔡般之禍及其國罪益著也曰立所不當立不得以擁戴
爲名則單劉尹氏各挾幼主首正其罪而衛晉王猛子朝之
見孥于下誅必及也曰大夫相放殺者誅則王札子之罪正
而侯國稱人者悉誅也曰士殺大夫者比諸盜則刑人不繫
國而主其國者與有誅也曰滅人者膏之雖齊桓之功不足
除惡沉虞之受賂莒之取後者乎曰執人者黜之雖桓文之

討罪猶責以自省況宋莊楚成之懷詐者乎曰執諸侯宜歸天子治其罪界宋人不得已也歸于楚則叛也曰執諸侯而釋于會者坐專執執以歸無王也築防血社尤惡也曰獲諸侯大夫者坐專獲殺陳佗義也戕郇子亂也曰殺大夫者坐專殺討樂盈義也漏言于射姑亂也誅譖臣可也殺諫臣罪也曰大夫不以道去者絕逐高克罪鄭伯也奔秦罪先昧也

曰公子不得臣異國衛蒯聵世子秦鍼母弟尤悖也曰無君

命不得稱兵華元圍彭城正也曼姑圍戚以靈公命故得為伯討趙鞅清君

側亂也然則有誅無絕者惟元功之臣見桓十七年注及聖人子孫

倍二十三年注而國不除者鮮矣有絕無誅者惟子于母為所生雖

輕于父而重于君而誅得避者鮮矣定四年注夫誅者小則譴罰

之甚者加之五刑又其甚者焚棄之辜磔之先王之典也注稱
梟者斬要皆秦法僖二十六年宣八年疏亦不的絕者輕則放流之絕其身重者諸
侯則變置之絕其子孫卿大夫則絕其小宗春秋之善善也
長惡惡也短父子兄弟罪不相及所謂禮義之大宗也

公羊何氏釋例卷四終